

Sas cosas bellas de su coro

(Tonino Puddu)

*Canta, non timas, canta amicu caru
ca juches cosas bellas in su coro,
bellas e fattas chin filos de oro
pro render custu cantu tantu raru.
Canta, non timas, canta amicu caru.*

*Canta chin boche crara cristallina
sa fama de sos fijos de Nugoro,
mantenende sos bantos che tesoro
mancari sian contos de cantina.
Canta chin boche crara cristallina.*

*Su cantadore siat de custu mundu
e sicut a pesare largu bolu
muttinde chin sa boch'e rosignolu
tottu sa zente a facher ballu tundu.
Su cantadore siat de custu mundu.*

*Canta chi non ti manchet s'allegria,
pro chi sa vida coles chen' e affannos;
e cando has a pessare a custos annos
t'ammentes custa bella melodia.
Canta chi non ti manchet s'allegria.*

*Canta, non timas, canta amicu caru
ca juches cosas bellas in su coro.*